

La Quotidiana 25-11-2013, p. 9

La vignetta d'autostrada resta sin 40 francs

■ (mc) La vignetta d'autostrada custa en Svizra er en l'avegnir 40 francs. Il suveran ha refusà ier l'augment dispitaivel sin 100 francs ed uschia era renvià l'extensiun da la rait d'autostrada cleramain cun ina maioritad da 60,5 pertschient.

In na era en il Grischun

Radund 1 662 800 votantas e votants han ditg na, radund 1 087 400 gea. Betg en in sulet chantun hai dà ina maioritad a favur da l'augment. En il Grischun han 30 293 sustegnì la proposta, 36 815 han refusà ella. La participaziun ha muntà en il Grischun a legraivels 50.16 pertschient. Il Grischun avess profità d'in gea cun la renconuschientscha da la Via dal Güglia da Tusaun fin Silvaplana sco via naziunala. Quei avess distgargià il tegnairchasa chantunal per radund 11 milliuns annualmain.

La pli gronda scunfita ha la proposta da cussegl federal e parlament fatg en il chantun da Friburg che ha refusà l'augment cun 69,4 pertschient. Cumparts da passa 65 pertschient hai era dà en ils chantuns Tessin, Genevra e Schaffusa.

Il pli aut sustegn ha il project chattà en il chantun da Neuchâtel cun ina cumpart da 49,39 pertschient. Sin ils emprims plazs suondan allura Basilea-citad cun 48,36 pertschient, Glaruna cun 48,7 pertschient. Tant Glaruna sco Neuchâtel avessan profità il pli bler dad in gea, damai che plirs sviaments sin lur intschess fissan vegnids finanziads da la confederaziun.

Renunzia a 400 kilometers autostrada

Suenter il na dal suveran na po la confederaziun betg resguardar radund 400 kilometers en la nova rait da las vias naziunalas sco i era stà planisà. Tut en tut avess quai custà a la confederaziun custs supplementars da radund 300 milliuns annualmain per investiziuns e mantegniment. La confederaziun aveva cumbinà l'extensiun da la rait da vias naziunalas cun in augment da la vignetta per uschia era pudair segirar la finanziaziun.